

欽  
定  
全  
唐  
文

欽定全唐文卷二百四十三目錄

李嶠二

代百寮請立周七廟表

爲朝集使等上尊號表

爲杭州崔使君賀加尊號表

爲百寮賀雪表

爲武攸暨賀雪表

爲納言姚璹等賀雪表

爲百寮賀日抱戴慶雲見表

爲百寮賀慶雲見表

爲納言姚璿等賀瑞桃表

爲百寮賀瑞筍表

爲納言姚璿等賀瑞石龜表

爲納言姚璿等賀瑞石表

爲百寮賀瑞石表

賀天尊瑞石及雨表

賀麟跡表

爲納言姚璿等賀破契丹表

爲雍州父老賀鑾駕停幸洛邑表

爲何舍人賀御書雜文表

爲韋右相賀拜洛表

爲秋官員外郎李敬仁賀聖躬新牙更生表

爲武承嗣等賀賊平後新殿成上禮食表

爲百寮賀恩制表

爲武承嗣讓知政事第二表

爲王及善讓內史第二表

欽定全唐文卷二百四十三

李嶠二

代百寮請立周七廟表

臣某等言臣聞享帝立廟陳乎太極之典尊祖配天載乎厥初之頌蓋用嚴宗虔祀敦孝睦親以修海內之職以崇天下之訓斯千帝百王之所因襲也四學三雍之所講肄也伏惟大周繼天作聖踵武嗣徽湛恩洎於行葦崇構興於縣隄陛下纂祖宗之洪緒資聖神之睿問乾坤合德日月在躬利澤浹幽顯光明燭宇宙用能誕膺休歷丕臨大

寶近惟神祇福祿之祚遠想稼穡艱難之業后稷以弼諧  
大舜隆姬錫受命之符太皇以翼亮有唐聖武當樂推之  
運七百之鴻基不墜九五之尊位以光天休薦委靈命再  
集豈非積善累慶深仁厚德之致歟夫源長者流深道悠  
者利博是以商廟觀德享祀彌乎七代牧野追尊行號光  
於三葉今者徽章改物宗石變音神靈扶更始之運億兆  
慶維新之業宜其憲章典禮損益質文奉嚴配之恒事採  
褒崇之故實三昭三穆對於不遷之祖八簋八簋存乎如  
在之敬然後上以化下卑不臨尊宏詩人永錫之義合周

易大觀之象豈惟祖考來格實懷安樂之心故亦夷夏式  
瞻載佇雍熙之福伏願浚發皇鑒時流天璽考經籍哲王  
之典雜摺紳先生之議涓時擇日冊祝備禮臣等得參陪  
振鷺洗滌大牲承奔走之下列觀肅邕之盛典則一人有  
慶子孫承永保之祥四海宅心臣下得自安之地無任懃  
懇之至

爲朝集使等上尊號表

臣某等言臣等聞正覺旣隱而苦海橫流衆教不興而業  
風亂起則有至人應運元聖撫期援手而拯其沈淪推心

而救其焚爇四生不慧必將有以宅其緣六度未康必將  
有以振其緒慈氏越古金輪聖神皇帝陛下業隆四諦德  
懋三空道成於祇劫之初迹遠於梵天之外而深惻末教  
俯哀流俗宏善推之畧下濟蒼生屈無上之尊降臨丹扆  
神功暢於明一至德覃於吹萬三千國土咸登福壽之庭  
百億天人並出塵勞之境能紹七佛之鴻業躡三身之正  
位雖多寶之證明法教出見空虛釋迦之愍護凡愚來遊  
穢濁未足以仰參神變遠媿仁慈臣等宿植有因生平多  
幸聖朝難遇類蓂葉之希逢法主儻來似曇花之一出屬



千齡之大慶欣萬劫之禎符是用下訪謳歌旁稽識籙攀  
玉署駕鴻之議雜金園龍象之謀拜手闕庭虔奉徽號叫  
帝閭而延佇徒罄丹誠仰天路而遲回不流元霈朝野失  
望衣冠沮色竊惟聖人忘己以百姓爲心菩薩救時共衆  
生合體是故屈伸進退因其志而不違變化感通順其求  
而不隔伏乞暫回聖慮俯鑒愚誠宏至公之大道畧鳴謙  
之小節特命有司勉膺殊典使尊名嘉號與法日而俱懸  
寶算靈基比恒沙而不極臣等得預陪下列攀奉末光長  
登正法之筵永樹來生之果豈不幸矣豈不大矣無任誠

懇之至謹詣闕固請以聞

爲杭州崔使君賀加尊號表

臣某言伏奉五月十一日制書陛下俯順羣情懋膺大典垂光休於百代被鴻私於萬族凡在含生孰不慶幸臣某中賀臣聞太朴旣謝旦昏之迹已殊聖道不追王霸之風且雜雖崇號廣溢遞享於尊名而德薄政衰不光於神器伏惟越古金輪聖神皇帝陛下承大雲之法記應榮河之寶籙以天上下天下之尊爲隆平太平之主不言而理三階正而六氣調不怒而威萬寓清而百蠻服延富壽於和平

制雍熙於易簡懷恩慕化之黨候雨占風疇德瑞聖之符  
非煙若霧青襟詠歎於庠塾黃髮謳吟於衢路固可使堯  
舜擁篲禹湯扶轂踰賢劫而首唱邈梵天而高視豈登三  
咸五邁古超今而已哉嘉號初登殊章備舉鋪帝容而建  
皇極大寶重光撫乾軸而正坤維洪爐再造仙渙與祥風  
俱動湛恩將洊雷並作緩姬文之獄旣削爰書錫漢后之  
醕且頒戎級滂流之澤出九掖而浸羣方扑躍之音自三  
川而周四海加以崇祇肅於梵宇致嚴恭於清廟申冤舉  
滯而有善必甄享德報功而無文咸秩規模粲而洋溢道

德純而布漢豈徒朝野稱慶觀美化之維新故亦神祇降  
祥見鴻基之載永臣叨延龜組繆分虎符千年有遇更逢  
開闢之初百辟相歡不預趨馳之末瞻雲路而式忤仰天  
庭而載佇踴躍之懷企聳無極不任鳧藻悅豫之至謹遣  
某官奉表陳賀以聞

爲百寮賀雪表

臣某等言臣聞至道充被而沖和感發元化沈潛而祥物  
昭應伏惟皇帝陛下合德天地齊光日月陶正氣之氤氲  
降元符之肸蠁用能經緯六合驅馭百靈垂旒法宮而品

物清晏揆景中土而風雨休若三元肇革九陽初動撞黃  
鍾而布氣順元冥而率職曾陰候律豐澤順時蒼蔚方興  
起太山之膚寸參差荐委自平地而盈尺銅街治其如素  
金隄紛其遂滿縈樓樓檻凝璧臺之九重落絮飄花似芳  
林之二月豈惟洛神呈象來舞帝宮故亦海騎相趨下朝  
仙闕東臯欣而望歲南史慶而書祥萬寶登秋居然可詠  
雙銅叶唱即事非遙自非睿感通微乾心輔德何以降神  
靈之滋液發兆庶之歡慶臣等恭承元造沐浴太和欣聖  
澤之滂沛對天休而踴躍無任鳧藻之至謹詣朝堂奉表

金史卷之三  
稱賀以聞

爲武攸暨賀雪表

臣某言自涉隆冬頗虧甘液皇情睠佇聖德憂勤囹圄之罹憊念祈寒之在節爰發恩造親慮囚徒絲綽始行寒光已布德音纔降同雲便飛落絮飄花與新梅而競彩凝光吐艷共霄桂而連輝俄盈九域之中遍灑四瀛之外遂使狴牢式舞布霈澤於三天畎畝長歌佇豐年之萬庾報應之速固影響而無違慶躍之私在臣妾而何極無任欣抃之至謹奉表陳賀以聞謹言

爲納言姚璿等賀雪表

臣某言自元冥授節素液未流宿麥翹滋陳根俟拔聖情  
迴睠天造曲成載想狴牢有矜幽滯方臨聽訟之觀且閱  
明刑之書中旨纔宣上元俄應沛乎降澤油然興雲凝瑞  
色於千里散禎祥於六出積素彌晝下集於瓊臺飄花滿  
空旁霑於玉樹海神奔走而來賀田畯謳吟而共舞靈心  
昭發事速於置郵聖意冥通有同於合契臣等謬當樞近  
親覲休祥抃躍之情實百恒品無任欣慶之至謹奉表陳  
賀以聞謹言

爲百寮賀日抱戴慶雲見表

臣某等言臣聞大人造物亨衢所以貞觀上帝懸象層穹  
所以照臨合其德而先後不違契其誠而表裏潛應伏惟  
聖母神皇陛下仰應顧託俯順謳歌臨天下之大寶當域  
中之正氣斟酌律度三神援亭毒之權鼓舞陰陽萬象入  
財成之契六幽金鏡四時玉燭凱澤將膏雨共流協氣與  
景風齊暢故能使天地儲祉靈祇降福樞紐薦符勾芒錫  
壽自呈有命洛書肇出惟宗社之饗德迪神明之祚聖象  
物昭應休徵煥發每至十二月元珉啓匣綠錯披題遷寶



祕於東序視衣纓於北闕必有仙鶴翔集雲鳥杲曜祥光  
入於九重異氣懸於三象雖復鼎來汾水黃雲冠於北山  
劍在豐城紫氣沖於南斗無以方斯影響近此闕天作符  
籙動而有徵日官考驗以爲常準日在朔月時惟孟秋奉  
鴻休而正位先告辰而解網休日申酉衆姬稱賀申禮旣  
畢詔示帝圖芝檢初開扶光未徙即有氤氲傳漢發祥於  
俛仰之間蕭索浮天舒彩於折旋之際於時睟容當宁嬪  
儀在列文物充於紫庭暉光察於元象或抱或戴拱環佩  
之威儀非煙非雲奪禕褕之彩色兩宮胥抃六妃式舞欣

就望之近臨悅光靈之下濟臣等謹案孝經援神契王者德至於天則日抱戴又黃氣抱日輔臣納忠瑞應圖曰天子德孝則慶雲出又曰天下太平慶雲見陛下宵衣旰食至德通於九元皇帝錫類推恩純孝刑於八表惟明求道若金在礪自物觀化如草從風屬千齡之景業承肆眚之鴻霈乾坤合而喜氣生圖籙啓而禎符作旣以發揮天德昭寶運之隆平且以光翼端章究靈心之終始自非上下和洽幽明薦成何以徵造化之神偉合天人之符契昔者元珪受命無聞感召之祥赤土披圖不發昭回之貺故知

冥祇戢道歷載祀而潛休靈物俟時當聖明而効用事超  
六籍之外聲高百王之表卓哉至矣無得而稱臣等謬奉  
隆知親承大慶朝聞夕死每竊抃於昌期手舞足蹈敢承  
歡於下列無任鳧藻踴躍之至謹詣闕奉表陳賀以聞

爲百寮賀慶雲見表

臣某等言伏見今月十一日誅反逆王慈徵等乃有慶雲  
見於申未之間蕭索滿空氣氲蔽日五彩畢備萬人同仰  
伏以慈徵等並典司戎旅出入禁闈反德亂常背天逆理  
聖靈感通神祇昭應雖逆節始萌而潛謀必兆窮姦回之

密計盡包藏之巨隱並膏斧鑕俱肆朝市五屬明啓嚴刑  
應於九秋萬寓悅豫嘉氣呈於三象此實天人合德宗社  
降休欣紫宸之永固在蒼生而知幸無任嘉慶之至謹拜  
表稱賀以聞

爲納言姚璦等賀瑞桃表

臣某等言伏見內出靈桃四實共同一蒂禁園芳果仙庭  
奇樹名珍杏柰族茂櫻胡鮮花發於上春嘉實成於早夏  
四而爲一表四夷之一君異而爲同明異方之同貫漢宮  
留核曾所未窺衛國報瓊何能竊似殊祥靈應疊貺駢臻

凡在見聞孰不歡躍臣等謬當樞近累覲休符喜抃之情  
實萬恒品無任欣慶之至謹奉陳賀以聞

爲百寮賀瑞筍表

臣某等言伏見舊明堂基前有叢竹抽新筍數莖綠籜含  
霜紫苞承雪凌九冬而擢穎冒重陰而發翠伏惟陛下仁  
兼動植化感靈祇故得萌動惟新象珍臺之更始貞堅效  
質符聖壽之無疆鄰帝座而虚心當歲寒而抱節一人有  
慶萬類呈祥凡在見聞孰不欣躍無任慶抃之至謹奉表  
稱賀以聞

爲納言姚璿等賀瑞石龜表

臣某言伏見衡州所進瑞石其形似龜頂上有文曰大周并有乾坤卦字左邊有王武九千字又有水火金木土字各依其方北邊兼有井字臣等詳觀靈字伏覩竒文事實非常理同神契首列大周之字表元首之尊左有王武之名明左契之執合乾坤之兩卦分金木之五行五行展轉而不窮兩卦周流而無極井以養物而知渥澤之下覃石以補天乃顯貞文而上列將以九千之寶祚嗣七百之鴻基兆發靈心事符嘉運況復名爲元武叶國姓而呈休出

自炎方迎嚮明而發祉神祇之命受託於四靈感應之符  
實超於千載臣等叨延恩弊屢覩嘉祥喜抃之情實百常  
品無任慶躍之至謹奉表陳賀以聞謹言

爲納言姚璿等賀瑞石表

臣某等言伏見瑞石有文曰武帝李彰好生臨國永保吉  
昌伏惟陛下受命旻穹降靈宗祏複棟重簷之禮嚴配昭  
升五刑九辟之科平反宥恤故能使三精孚德七廟垂祥  
頻降靈符屢彰潛祉好生臨國實開琬炎之文永保吉昌  
顯示堅貞之籙隆萬代之遐算曠千齡而不聞臣等叨沐

恩私謬當樞近親覲休寶相趨抃躍無任喜慶之至謹奉  
表稱賀以聞仍請出示百寮并錄付史館

爲百寮賀瑞石表

臣某等言臣聞高明博臨無遠不應正直潛感雖幽必通  
伏惟皇太后陛下慶發曾沙業隆大寶以至明當宗社之  
寄以至聖合乾坤之德荷三葉之休光承五形之歷紀平  
秩庶政大亨羣物冠帶遐荒之域天福日臨閭閻富壽之  
氓禮變樂和液露霑洽休徵昭顯用能上披乾象下發坤  
珍吐川之靈祕開神之韞匱伏見雍州永安縣人唐同泰



於洛水中得瑞石一枚上有紫脉成文曰聖母臨人永昌  
帝業八字臣等抃窺靈跡駭矚珍圖俯仰殊觀相趨動色  
竊惟聖德奉天遞爲先後神道助教相因發明陛下對越  
昭升欽若扶揖允塞人祇之望實當天地之心所以幽贊  
嘉兆傍通景貺且人稱同泰縣實永安姓氏將國號元符  
土地與石文明應表裏潛會樞機冥發明宴坐之逾昌驗  
皇基之永泰則自然之無朕不測之謂神非夫道格昊蒼  
德充幽顯豈能發何言之微旨臻不召之靈物考皇圖於  
金冊搜瑞典於瑤編則有蟲蠹成文魚鱗吐匣丹書集於

昌戶綠錯薦於堯壇或詞隱密微或氣藏識緯莫究天人  
之際罕甄神祕之心未有昭聖毓靈發祥隕祉明白顯著  
燭曜暉光若斯之盛者也且夫導洛疏津卜瀍經宇是開  
帝王之宅實謂龜書之泉伯禹以致孝鬼神九疇天錫陞  
下以虔恭顧託八篆靈開超萬祀而同存歷百世而罕逮  
況乎陰陽景測朝市天臨號令施於四海機衡動於萬國  
靈心叶贊景業會昌薦希代之鴻寶獲非常之嘉應固可  
以明裡大寶禮秩介邱副神宗之廼眷荅上元之蕃祉臣  
等遇偶休明榮參簪笏千年旦暮邀逢累聖之期百辟歌

謳喜屬三靈之慶無任鳧藻踴躍之至謹奉表詣闕陳賀  
以聞

賀天尊瑞石及雨表

臣開大悲握契汲引之數盈千元聖垂機感現之瑞不一  
隨緣應俗或作孺童降跡通凡常爲長者然則前佛皆同  
一字可通一作道非道理兩名至矣哉不可得而稱也伏惟

天冊金輪聖神皇帝陛下功成塵劫跡御金輪萬姓樂推  
百靈欣戴如來備記昔避天女之宮菩薩降生遂坐人王  
之國臣等一昨伏見西岳雲臺觀道士奏稱御像瑞石大

妙至極天尊一鋪創造聖容未施五色宿昔之頃畫績自  
然不加之分宛同神化七十二相合而成體八十一好散  
而成章披絳雲之室闢明霞之館千乘億騎浮空而下九  
仙五老步虛而來羽抱錦帔風搖雲起龍文而鳳章日縣  
而月綴威儀而睟侍衛舞聲坐疑龍漢之遊何必仙山之  
會自非陰陽不測變化無方憑法匠之威靈假神功之動  
用其孰能與於此中賀臣等又聞先天後天聖德合於無  
象欲雨而雨元契通於不言日者王室闕聞炎方在候陞  
下乘朱駱駕赤騶歷太陽之中道居明堂之左个百神受

職萬國來朝旣配帝而嚴禋亦統天而布政是時也慈雲  
結慶甘露流香微風蕭然纖塵不起凡百在宥動色相歡  
咸以爲天者萬人之本物有不霑於澤者則仰皇天而望  
之有不覃於惠者則籲告而請之更祈洪澍輒聞流潦俄  
而油雲族晚覆雙闕而朝濟膏雨及私浹三川而夜下郊  
原吐潤呈彙霑蘇麥壟纖莖已濯兩岐之秀黍田香粒方  
滋合穎之苗凡在羣生不勝幸甚然後知御雲臺而占繇  
幸洛陽而錄囚蓋其眇少曾何髣髴臣等幸忝簪笏預睹  
珍符惟德洞冥即叶元皇之化惟靈薦福長延梵帝之尊

扑蹈之情倍百恒品無任鳧藻之至

賀麟跡表

臣某言今月十六日聖上擬檢行安置大像處其夜舊著大像曜儀院內從南行向北總有八十一麟跡見外無入處內有出蹤靈貺潛開禎符顯發惟此仁獸獨冠毛羣識變知機通靈感化悟金輪之欲轉即見殊祥知玉輦之方遊先呈異跡九九爲數明厯算之無疆濯濯咸歌見休明之有應五蹄顯五方之會一角彰一統之符式廣鴻基方宏象教昔有鳳巢軒閣纓冕相趨龍止堯壇神祇動色豈

若祥開紫掖瑞威元樞發揮萬劫之符幽贊三天之果美  
超五籍珍越四靈曠千古而不聞超九皇而獨遠臣濫承  
驅策親覲嘉祥欣慶之情實倍恒品無任抃躍之至謹奉  
表陳賀以聞伏請頒示天下錄付史館

爲納言姚璿等賀破契丹表

臣某等言伏見遼東都督高仇須承露布逆賊孫萬斬等  
驅率凶黨燒逼州城城中出兵與其賊拒戰則有飛廉作  
氣回祿揚燄起沙礫而薄天助茲鼙鼓吹煙火而漲日燎  
彼鴻毛靈應潛施勇士皆奮遂使妖徒震懾亂轍而奪旗

善戰橫行摧枯而拉朽僵屍蔽於草莽俘馘聚於轅門善  
馬咸牧名王且繫無假燒雞之策而觀其自焚不勞燧象  
之師而撲其餘燼又凶渠不逞將竊號而假名逆黨未悛  
止挺妖而怙亂或神摧其股或天厲其身似安國之登車  
同伯牛之自牖故知高明輔順正直司憊惟辟好仁與乾  
坤而合德惟狂樂禍在神鬼而同誅方看翦滅之期行覲  
凱旋之奏臣等叨延弊渥謬奉軒墀抃躍之情實萬恒品  
無任慶快之至謹奉表稱賀以聞謹言

爲雍州父老賀鑾駕停幸洛邑表



臣等某言伏奉今日詔書鑾駕停幸洛邑臣等輕生多  
幸淺識逢時青襟遊聖人之國白首觀太平之化常恐涓  
埃難效溝壑易期所以眷戀軒宇徘徊霄極日者農秋斲  
缺庶政微勤天皇損上益下忘身循物便欲移鑾徙蹕望  
河洛之封畿削賦蠲徭罷咸秦之力役臣等仰銘元造退  
揆愚心誠以天府膏腴帝畿殷實雖畱畬之務稍闕於千  
箱而衣食所資尚豐於累載況憚嫠嫠給家室乂安何容  
使展座鳴謙聖躬服劬勞之事衡門高枕臣等蒙過差之  
澤是用低徊跼蹐杼軸慙惶方且選議蓬茨推中襟於白

屋因言槐棘升下情於紫路不謂乾心俯應聖德潛融降  
六璽而紆紱回三光而改照人欲天從旣通誠感稟靈含  
氣疇非慶躍竊惟政途非一朝務有恒國彛不可以恩廢  
家征不可以事闕天皇愛精頤壽荅兆庶之歡心臣等畢  
力窮年供黍稷之餘稅庶得百度無曠九功惟敘伏望皇  
明乃睠輿輦少安則海甸蒸人撫耕鑿而知勉渭濱遺老  
仰雲天而識庇無任踴躍之至

爲何舍人賀御書雜文表

臣彥先等言臣於梁王三思處見御書雜文尺牘凡九十

卷跪發珍藏肅承瑤檢天文景鑠璧合而珠連聖理雲迴  
鸞驚而鳳集究黃軒鳥跡之巧殫紫府結空之勢偃波垂  
露會寶意而咸新半魄全曦象天形而得妙固已竒蹤絕  
俗美態入神掩八體而擅規模冠千齡而垂楷法重以語  
成四教文總六詩聲咀徵而含宮旨懲違而勸德用之於  
國敦風俗而厚人倫行之於家習雍和而崇孝敬惟彼良  
翰特蒙殊弊銘厚渥而歡悚竭深誠而奉戴是用編之玉  
軸勒以銀繩盡罄梁珠特裝璜瑁之匣總收陶璧用飾瑠  
璃之筍雕鏤十品緹巾萬襲芸香却蠹芝體爲封珍寶之

精下燭西崑之岫文章之氣上纏東壁之象實可謂天下之妙迹域中之奇觀者焉臣等幸遇休明叨近簪笏駭矚非常之瑞欣逢不世之寶足蹈手舞徒懷鑽仰之心夕死朝聞豈識名言之地無任抃躍歡欣之至謹奉表陳賀以聞

爲韋右相賀拜洛表

臣某等言伏見五月九日制書將拜圖溫洛肅事南郊御朝堂列羣后恭聞大禮不勝慶躍臣某中賀微臣泛覽金冊詳窺玉版商較於七十二代下上於數百千年以義軒

稱皇所貴者河圖龍出以堯舜稱帝所尊者洛書龜負猶  
未聞總集靈命宏敷聖業籠大勛於萬代盡能事於一朝  
非天下之至神其孰能與此乎伏惟皇太后陛下肅膺遺  
託光踐丕基皇業高於補天母德隆於配地東西浹洽窮  
八際而流河海南北貞明洞六幽而懸日月淹中訪禮汶  
上披圖情每留於布政義不忘於宗祀於是全謀聖造異  
制神行迎四象而疏闡向八風而闢牖上圓法天而煙雲  
爲之動色下方象地而龜玉所以呈姿元功叡範洋溢於  
歌頌祕采靈文昭彰於篆刻豈白銀青玉惟傳地理之經

黃魚黑鳥但播天乙之號可以荅上元之命可以光累聖之隆制有司陳法駕用禋柴之典採沈璧之儀然後負黼展而朝百神垂衣裳而會萬國不亦休哉不亦盛哉臣忝預出征恨深留滯河西弔影銜珠之託未申洛北馳心拊石之歡何極不任悚懼之至

爲秋官員外郎李敬仁賀聖躬新牙更生表

臣敬仁言昨因奏事蒙恩入對伏見陛下所御湛露殿三間雨閒雨漏無所修葺又因顧問之次伏承聖旨云去年口中生一齒今年又生一牙臣伏以聖德謙沖躬自菲薄

富有四海尊居萬乘而中堂外扉不閱於寒暑上棟下宇  
未離於燥濕降紫宸而齊白屋屈帝力而用氓心雖昔之  
采椽土階茅茨蒿柱漢皇之儉用夏后之卑宮六籍之所  
讚揚百家之所記述曷足以希風上聖仰帝道之崇高擁  
篲後塵望皇輿之軌躅臣又聞之易有四營金牙爲壽考  
之象詩有六義玉齒載神仙之謠還年而編貝不虧却老  
而瓠犀仍出亦有堅而不脫聞於導養之方落而更生得  
自靈飛之散斯並道藏幽記術隱上清誠福力之所招匪  
勤求而可致陛下端莊靜默寬惠仁慈抑嗜欲而省煩勞

恤饑寒而甘弊陋宜其延貺宗社受報黎元集天地之休  
和享靈祇之介祉故得百祥護體五福登年同鎬邑之夢  
齡邁鑣宮之錫壽豈徒一人有慶常居北極之尊實乃萬  
姓同歡共仰南山之固臣謬以庸賤獲奉宸嚴欣聖壽之  
延長願稱大慶見宸居之挹損思揚至德乞宣示海內仍  
錄付史館庶使六合之中知寶算之方永百代之後頌休  
風而不絕無任抃躍之至謹詣闕奉表陳賀以聞

爲武承嗣等賀賊平後新殿成上禮食表

臣承嗣等言伏見逆賊盡滅未誅先艷叛奚部落不守自



降或貫盈而亡或懾懼而伏行從除殄不勝慶快臣承嗣  
等中賀臣聞違逆助順穹昊所以照臨振遠懷荒邦家所  
以底定蠢茲豺虺憬彼犬羊稱亂白山虔劉蒼海豈徒石  
砮楛矢式遏於天朝故亦桑弧鐵衣憑陵於邊朔陛下乃  
睠愚悖情深遵養聊用七旬之舞未加五戎之罰雖大聖  
之德恒存於好生而冥祇之心有切於除害驅桃都之厲  
鬼剿檀石之妖魃不資舉網之勤而長鯨已曝無假合圍  
之費而封豕先屠有以知神道之難誣有以見天心之不  
遠元凶旣覆餘孽旋殲畏威者鼠竄而離心懷惠者鴈行

而革面毳幘連路氍毹裘成市與夫姬得瑞穎期越裳於累  
年漢獲駢柯俟匈奴於後歲若斯而已也方傾巢而盡落  
佇匣刃而藏鋒自非睿感潛通靈符叶贊豈能使天地假  
手幽顯同心及有秩之方歌屬斯千之肇獻上棟下宇儲  
百福而擁神休開陽闔陰積千祥而宜聖壽配南山而永  
固與北極而長尊仙聖所以安居黎元由其式抃臣等幸  
逢昌運叨延嘉弊喜遐陬之霧廓且覲歸牛欣大廈之天  
臨方同賀雀願奉需雲之慶思承湛露之歡無任區區之  
誠謹上禮食若干舉蘋羞何有希陳上帝之筵芻豢非珍

遂同野人之獻旋顧單菲追增悚忤謹隨表進奉以聞臣承嗣等誠歡誠喜頓首頓首

爲百寮賀恩制表

臣某以下文武官九品以上二千七百五十人等言臣等伏見今月九日恩制緣逆人親屬有能公勤清白者自當隨材擢用不以爲瑕宜各坦懷佇收來効臣等仰承恩造伏誦德音感戴屏營忭舞相屬臣某等誠歡誠喜頓首頓首死罪死罪臣聞父殲子興聖賢忠厚之教身死宗戮季末陵夷之道或罰不及嗣或禍并其族淳朴浸往惻隱不

逮於昆蟲法令滋章網羅必及於麇卵天厭淫虐誕興明  
聖掃百王之餘弊張網羅而更理去貪殘而遂生育品物  
昭蘇哀獄訟而緩虔劉寰瀛凱懌刻薄之風盡敦厚之化  
流猶且締想納隍凝情溝壑在予之旨固以刑於萬方拯  
物之心豈直解其三面日者亂臣干紀巨猾滔天將傾渤  
海之流且觸崑山之柱陛下傷澆浞之爲變弔管蔡之不  
咸法雷電之威誅而不怒用春秋之義斷必以情擢其髮  
而葬其尸殲其魁而宥其黨漢主三夷之法黜而不行秦  
王九族之刑矜而莫用至若瓜連萍託枝附葉隨或玉石

難分或淄澠易混俱削嫌疑之迹槩從寬大之文遷州貶  
縣纔示於小懲竄海投沙尚班於榮級則是我有大造於  
羣凶也而聖慈無已天澤逾隆並運四時乃錫造於平分  
之外不遺萬物尚加惠於曲成之表使枯朽之幹向秋而  
更榮窮涸之鱗在轍而能躍藏其疾而舍其垢責其效而  
要其功雖魏士之私於外朝獲安反側商人之染於汙俗  
咸與維新無以匹此含宏方斯滌蕩陛下祚始豐鎬嗣周  
家之忠信卜於瀍洛承夏鼎之休明三后在天日歆於盛  
德四夷爲守永慕於高義方當鬼神降福豈止黎庶歸心

臣等沐道昌期叨榮顯列觀太平之德禮聽中和之詩頌  
雨露之施徒仰於財成天地之仁豈議於酬答無任欣戴  
踴躍之至謹詣朝堂奉表陳賀以聞臣某等誠歡誠喜頓  
首頓首死罪死罪謹言

爲武承嗣讓知政事第二表

臣某言臣由衷之辭已具前表分外之澤仍叨後恩祇命  
低迴不知所處臣某誠惶誠恐頓首頓首死罪死罪臣九  
能無術五技不成空荷陶甄竟微知效陛下篤猶子之愛  
用家人之慈流其渥恩被以簪組析珪分器等姬氏之藩

維裂壤誓河承漢家之禮秩皇儀曉列拜金展而升玉墀  
仙蹕晨遊陪柏梁而侍蒿柱在臣榮幸實冠等夷惟臣妄  
庸已成忝越豈可以仍祗大命更竊厚恩任濟時之股肱  
爲巨川之舟楫且臣屬居宗室地接葭莩惟社稷之安危  
乃門庭之休戚豈不願磨頂至踵禪高益深徒以智力有  
涯勉強無地懼傾軛之爲敗憂折鼎之生災匪藏器而謀  
身實輸誠而體國伏乞俯矜愚劣永鑒隆替思懋賞懋官  
之義用知臣知子之心特停過恩速寢嚴命則物情輿議  
咸仰於至公叨榮謬官不塵於則哲無任慙懼屏營之至

謹詣閣奉表以聞

爲王及善讓內史第二表

臣及善言臣叨荷殊私冒陳至懇而惕慮昏於凡識深誠  
蔽於短辭丹梁罔通紫泥徒渥祇奉還答周惶失措臣中  
謝臣才疎行缺運偶時來榮匪德遷官由恩達法河象岳  
升臺歷府行參八命坐陟九霄彤軒阜騶非振鷺之飾青  
組丹紱是濡鵜之譏施重邱山效微涓滴妨賢自久速謗  
滋深頃因齒髮之衰得蒙骸骨之賜西河退老非翫經書  
東海歸閒空求藥餌方養支離之疾翻成愷悌之恩曲降



絲綸重收簪屨徵榮朽木責焰寒灰將使策蹇磨鉛入總  
樞祕牽羸引僊參典鈞石仰抃恩渥顧探心守桑榆且晏  
蒲柳先秋方與絳縣老人論其甲子淄川艾耄比其容貌  
將何以對敷金展趨奉玉墀當鳳沼之便蕃望龍闈之清  
切況寅亮皇極經綸帝道功參濟巨義等作霖隆替是因  
具瞻斯在永言授受豈當容易是用深鑒陳力載懷量已  
方憂折鼎乞保懸車且今百度惟貞九流式序鵷鴻齊列  
俊乂在官豈可使畫虎承羞豐貂竊幸謬中孚之好爵辱  
大雅之能官伏願深惟至公俯收曲澤矜此疲劣改命才

賢則器滿之凶不累於愚叟棟隆之吉永光於聖代無任  
慚懼屏營之至謹重詣朝堂奉表以聞

欽定全唐文卷二百四十四目錄

李嶠三

爲王方慶讓鳳閣侍郎表

第二表

爲楊執柔讓同鳳閣鸞臺平章事表

讓知政事表

讓鸞臺侍郎表

爲張令讓麟臺監封國公表

爲第二舅讓江州刺史表

爲武嗣宗讓陝州刺史表

爲竇孝諶讓潤州刺史表

爲李景諶讓天官尚書表

讓地官尚書表

爲歐陽通讓夏官尚書表

爲楊執柔讓夏官尚書表

爲歐陽通讓司禮卿第二表

爲武重規讓司禮卿表

爲崔神基讓司賓卿表

爲宗楚客讓營繕大監第三表

爲王遺恕讓殿中少監表

爲第十舅讓殿中監兼仗內閑廐表

讓麟臺少監表

讓成均祭酒表

自內史再讓成均祭酒表

爲武攸暨讓官封表

爲武攸暨讓兼知司禮寺事表

欽定全唐文卷二百四十四

李嶠三

爲王方慶讓鳳閣侍郎表

臣某言伏奉恩制以臣爲鳳閣侍郎同鳳閣鸞臺平章事  
恩寵光臨獎飾踰分虔荷明命營魂失守臣某中謝臣學  
非儒墨術異商韓文乏斧藻藝慚刀筆屬乾坤貞觀日月  
光輝飛龍在天而庶物咸覩仙兔離畢而羣萌皆潤遂得  
封植樗散謬齒於翹薪翦拂駑駘濫陪於逸驥驟荷私遇  
頻階榮擢入參丹閣出擁彤騶爰自海邦遂升河輦佩若

若之綬驚鱗鱗之轂叨恩竊幸空變星霜尸祿妨官曾微  
報效宜受素飡之責翻成黃閣之榮夕拜瑣闥朝陪禁省  
敢希任先淑睿之美每憂王歆謬誤之失而天慈逾渥聖  
澤無涯爰迴斗極之暉更寵掖垣之授下神畿而入仙禁  
未變葭灰自鸞渚而遊鳳池僅彫萸葉荀侯之十旬累命  
未可爲儔車公之同日九遷曾無足比旣超倫而邁等實  
負愧而承羞臣亦何人敢叨非據況樞祕之重絲綸是職  
言參元化步入紫微臣蒲柳旣秋桑榆漸迫耄期云及衰  
疾徂侵以日眊之歌當夜行之罪招愆獲謗非爲身謀敗

駕傾餽將貽國負蓋力周於用則輕重咸宜任過其材知  
巨細同躋伏願察臣知止之分矜臣自量之情杲乎出日  
迴三舍之光油然作雲垂九霄之澤曲收過謬改命才賢  
則維鵜之譏不起於輿誦振鷺之詠復聞於朝序無任悚  
懼之至謹詣朝堂奉表以聞所讓人別狀封進臣某誠惶  
誠恐頓首頓首死罪死罪謹言

第二表

臣某言臣由衷之祈已具前奏而不次之澤仍垂後恩俯  
仰慚懼莫知啟處臣某誠惶誠恐頓首頓首死罪死罪臣



爰從壯齒不逮儕流況在耄期曾何志力嗟負鼎之無術  
患挈瓶而屢空徒以慶雲垂津枯槁蒙澤杲日流煦嚴霜  
不凋貪及聖明之長願從簪屨之列僂俛榮祿推遷歲時  
豈忘陳力之言方致乞骸之請不謂聖慈迴睠天造曲成  
東膠尚賢未始澄汰西伯養老更垂優渥拔跡囂滓之曹  
假寵神仙之署二離齊景八舍連芳款段涉千里之途輪  
囷爲萬乘之器龍池沐髮始暢前榮鳳沼躍鱗旋叨後命  
顧茲疲朽理絕琢磨在方圓而罕施顧長短而無取豈可  
以仍塵帝載累素國經使身貽鼎覆之憂朝失棟隆之舉

是用內慙外懼夕惕晨興輕薦本誠敢謝非飾伏乞矜臣  
難奪之志體臣不移之愚特停過恩改命賢哲則濟濟之  
詠復聞於聖朝洋洋之美不專於曩載無任慚懼之至謹  
重詣朝堂奉表以聞

爲楊執柔讓同鳳閣鸞臺平章事表

臣某言伏奉恩制命臣同鳳閣鸞臺平章事受命祗懼載  
驚魂爽臣執柔誠惶誠恐頓首頓首死罪死罪臣聞任官  
擇人哲王之所不易陳力審分忠臣之所宜守固當使寵  
私路絕公直道行然後能謗讟不興緝熙有寄臣材非上

達地則外姻攀日月之末光承雨露之餘渥遂得持衡天  
闕攝職斗樞塵八座之政本忝三軍之戎務高秩厚位徒  
辱於庸虛弱霧輕埃竟微於荅效盤桓寵祿俛歲時甘  
受維鵜之刺寧懷振鷺之舉而聖慈無已天造彌隆復使  
參掌國鈞預聞執政撫已慚悸捫心震越夫以衡石萬機  
鹽梅三鉉參翕闢之元造輔丹青之景化自非騰莘占渭  
出昴乘箕安可寅亮帝圖弼諧邦教臣之蒙蔽久塵聽覽  
豈足以傍允物情上迴天鑒承舟楫之遠託當股肱之重  
寄伏願暫停旒纁俯擇芻蕘搜訪才良用平分之道屏絕

私昵收曲成之惠則域中多幸天下至公豈惟匪服免譏  
臣無器滿之懼固亦得賢斯在朝有棟隆之吉無任慚悚  
之至謹詣朝堂奉表以聞

讓知政事表

臣某言伏奉恩旨令臣同鳳閣鸞臺平章事有命自天光  
寵踰量如集於木啟處失圖臣嶠誠惶誠恐頓首頓首死  
罪死罪臣聞簡賢任能百揆所以時敘謬官失職九流於  
是咸曠隆替所寄義不可輕臣才實凡庸志無遠大叨預  
簪履遂升臺閣踐金門而遊石室掌狐史而參鳳綸被蜉

游之衣徒竊榮寵接鴛鴦之羽久慙尸曠甘受妨賢之責  
忽承非次之恩仍使參預機衡獻替帷幄持濟巨之舟楫  
味和羹之醯醢以挈瓶之智陪負鼎之遊將何以祇奉帝  
難弼亮皇極況丹青所運鼓舞通於四時鑪錘所裁綱紀  
行於萬俗動關政體豈易其人臣才闕行踈藝殫術淺同  
子房之多病異吳漢之強力策支離之杖未振其軀資擁  
腫之材豈勝其任將恐貽災傾餗取辱敗軍喪實虧名夫  
豈足惜害公撓法茲焉是懼敢緣陳力之義輕布由衷之  
請伏冀九霄垂澤三舍迴光體臣不移之愚矜臣難奪之

志特停過謬改命才賢則器滿之凶不累於凡鄙棟隆之吉永光於聖代無任慚懼屏營之至謹詣朝堂奉表陳讓以聞

讓鸞臺侍郎表

臣某言伏奉恩制以臣爲鸞臺侍郎依舊同鸞臺鳳閣平章事兼修國史仰祇聖澤退揆愚衷周章失圖怵惕惟厲臣某誠惶誠恐頓首頓首死罪死罪臣聞疇德而授則尸曠之譏絕推恩而舉則緝熙之道廢臣志狹量淺業空理踈揆才異言行之科入仕非廉高之選邀屬時幸累叨榮

級石渠麟閣司典籍之林金門鳳池參廟堂之議以小才而居大任用近智而恢遠略緣鶴之鼎旣失於鹽梅濡鵜之衣實慚於紱冕甘待素飡之責忽承非次之恩夫以瑣闥崇嚴玉堂祕近職參持蓋位亞掌壺子雲以善屬文詞始應夕拜李真以妙通經術方陪旦講臣之愚陋實畏友朋豈足以奉帷幄之昌言聯名賢之逸軌且短才不齒未減雙鳧之數豐秩妄加必喪羣龍之績陛下經緯品物搜揚管庫方使道風德範遠出帝先豈令敗政妨官近自臣始伏願俯收人望顧惜朝班特迴寵光改命賢俊則百工

寅亮長無鼎覆之憂二階底平自有棟隆之吉無任感戴  
屏營之至謹詣朝堂奉表陳請以聞其所讓人具如別狀  
臣某誠惶誠恐頓首頓首死罪死罪謹言

爲張令讓麟臺監封國公表

臣某言臣短辭易窮愚意難達雖由衷之訴累黷於清規  
而臨下之明未照於丹慤伏奉還旨更優前命心魂交悸  
啟處失圖臣某誠惶誠恐頓首頓首死罪死罪竊惟服勤  
致用事主之名節推誠納忠爲臣之職分凡列衣冠之序  
忝升教義之筵立身揚名孰不由此況臣沐浴盛化被服



隆恩陪萬乘之旌旃列四臣之禦侮犬馬立效雖未堪申  
防代勞鷹鷂有情豈敢忘除兇弭慝論削蒲之釁逆舉觸  
瑟之祆變蓋惟恒事豈足言功陛下錄臣諛才收臣薄藝  
以某纓組舊業頗聞於義方山林遠情粗閑於道術訪其  
隱仙之訣求其詩禮之對不行而至坐辭麋鹿之羣無翼  
而飛遂接鴛鴻之侶久慙粉米之飾欲辭稻粱之惠日來  
月往猶戀於軒墀雨施雲行亟迴於印綬今復更申殊獎  
追敘微庸以臣子之恒情辱公卿之顯位等威齊乎四履  
名器光於五臺緼禮崇徽頓榮於非據深憂巨惕更切於

如臨夫不失賞刑先王所以撫中外大明黜陟前典所以  
正邦家中麋豹之侯僅堪封爵乏羔羊之節無階流品乃  
賢哲之所慎豈庸微之敢安是用仰辭渥恩俯誓肌骨寧  
甘於犯違朝憲不可以虧損帝難固守不移之愚庶全難  
奪之志伏冀南離迴耀微察於傾心北斗垂芒稍矜於走  
魄特停過謬曲賜優容使官謗不誼工歌有序則無私之  
覆彌大於九元至公之途永隆於萬國無任忝竊慙懼屏  
營之至謹重詣朝堂奉表固請以聞

爲第二舅讓江州刺史表

臣某言伏奉恩制以臣爲江州刺史寵命載臨憂惕若厲臣某誠惶誠恐頓首頓首死罪死罪臣行踈道缺學淺藝空百里絃歌尠蒲密之化六條贊貳乏海沂之績幸屬乾坤改旦堯舜爲君下邑多淳朴之氓太平無峻切之政遂得逾安高秩未抵直繩尚且叨價藩庭竊譽人口挂二星之光彩達九臯於霄漢畫餅虛名孰云可錄素餐厚責猶懼未弭不謂聖恩旁暢天造曲成錫大官之印綬剖專城之符竹飲冰懷炭內慙外悚況夏首西浮水陸交湊荆門東會舳艫相接是謂九江之府實殷三楚之郊旋顧庸虛

本慙幹理將何以階浮獸之政術奉錫龜之職貢負乘之累豈但於身災敗駕之憂慮虧於國重臣雖貪冒苟且進趨至於上負帝難下速官誘猶知恐懼不敢寢默伏願迴光三舍收霈九天徵漢濱之翹楚罷燕宮之緹襲則共理之寄無蹇於外臺得賢之什復聞於中宸無任悚慙之至謹詣朝堂奉表以聞謹言

爲武嗣宗讓陝州刺史表

臣某言臣謬延殊獎改牧大藩由中之訴已薦於宸扆恤下之鑒未迴於霄極祇奉還命啟處失圖臣某誠惶誠恐

頓首頓首死罪死罪臣地則葭草質惟樗散實慙淮南好  
古之意有謝東平爲善之樂徒以攀光日月藉慶雲霄遂  
得升降玉除珮服金璽四科取士本異賢良五等建侯自  
緣恩澤常懼貽累宗室取笑衣冠上缺麟趾之風下招鵜  
翼之刺不謂聖慈愈厚天造彌隆收其十舍之才委以六  
條之任雖臻榮益觀竊抃於如絲而謬職妨賢顧慙於匪  
服況神臯名岳天府上腴是殷帝畿實始王化東則二南  
作頌有周召之餘風西則三輔式歌望趙張之遺跡顧循  
庸昧本慙政理將何以肅應殊典崇藩屏之位繼踵前良

致京師之福不能者止竊銘於夙心非據必危敢忘於大  
誠伏願斲紆聖鑒俯收愚款永懷至公之道特寢曲私之  
澤則符竹有寄長無尸素之譏禰薪得才不失朝廷之序  
無任慙懼之至謹重詣朝堂奉表陳請以聞

爲竇孝謚讓潤州刺史表

臣某言伏奉恩制以臣爲潤州刺史祇奉寵榮俯仰慙惕  
臣某誠惶誠恐頓首頓首死罪死罪臣尺澤輕生斗筭淺  
品行非三德藝乏四科屬雲雨曲成山川廣納遂得差肩  
冕笏簞羽鴛鴦自兼司天地副象河海空陪九卿之末詎

達三禮之源柏梁賦詩徒迷鍾磬槐市講藝更慙几杖當  
曰妨賢獲罪豈以稱職爲功而皇矣高臨霈然降澤乃爲  
棘寺還剖竹符入奉千乘之尊出當六條之寄叨恩竊幸  
自初泊末夫以下邑樹風是惟政本外臺驅傳實總人極  
薛宣以理劇有才滿歲加授龔遂以撥繁無效數月召還  
歷選前猷實資共理安可使赤紱虛忝素餐高詠伏願敦  
名器之實絕過謬之私更簡良才言刈其楚則山谷耆老  
方懷樹李之觀江湖吏人不起伐檀之刺無任悚懼之至  
謹詣朝堂奉表以聞臣所讓人具如別狀臣某誠惶誠恐

頓首頓首死罪死罪謹言

爲李景謨讓天官尚書表

臣景謨言伏奉恩制以臣爲天官尚書寵命載臨震悸交集鞠躬自覲屏營無措臣景謨誠惶誠恐頓首頓首死罪死罪臣聞俊乂在官百揆所以時敘名器妄假九流於是咸曠事關隆替義難忝越臣才疎行缺學淺智空十舍無千里之資一經乏三冬之敏徒以遭逢昌運因藉時來幸雨露之曲成遇山川之廣納遂得差肩冕笏比跡流品出入臺省周旋階闥鏘金鳴玉坐榮枯朽擊水搏風顧慙腹



背自忝司衡鏡亟易星灰雖智力已窮而清通未效朱紫  
多紊涇渭莫辯宜其抵罪觸網稍清官謗翻乃假寵增服  
更垂天獎是用荷恩內訟以榮爲憂且夫八座位隆五曹  
望重典南宮之喉舌象北斗之樞機式資藻鑑奚綜實實  
自非孝先亮直彥輔公忠山濤之簡靜篤素顧譚之心精  
體密何以對揚天哲厭塞人望顧斯政本實總國彝豈臣  
庸愚所堪尸忝伏願迴光寢照返汗收恩察臣由衷之請  
矜臣陳力之議則朝端允穆天下至公四始輟在梁之譏  
六爻無負乘之累矣無任慙懼之至謹詣朝堂奉表以聞

其所讓人具如別狀臣景湛誠惶誠恐頓首頓首死罪死罪謹言

讓地官尚書表

臣某言伏奉制旨以臣爲地官尚書無涯之恩忽降霄極非據之惕坐驚魂宇臣某誠惶誠恐頓首頓首死罪死罪臣少無奇志長乏異能短步非疾於騁翺翺飛自同於燕雀逢聖神之再造屬天地之兼容鄭璞齊竽竊混聲價秦冠漢綬叨踐名級步駕池之清切陟鸞渚之便蕃出入五臺周旋三閣行膺負璽之任遂服專車之寵萬機損益蔽

於庸陋之心百揆謨猷滯於膏肓之疾爰發皇揆特留宸  
眷假優閑之秩雖入杏壇參翊亮之謀尚和梅鼎徒延舟  
楫之舉竟微股肱之效挈瓶之智患在於空虛瞰室之災  
懼深於盈滿方陳骸骨之情遽荷雲霄之命負乘之責前  
謗未除忝越之譏後恩仍及還振蜉蝣之羽欲參龍鳳之  
行赤紱妨賢物知不可素食得位臣亦胡顏況八座樞機  
五曹要劇上儀七星之象旁理萬邦之教自非元凱之明  
允忠肅陳韓之敦樸淳深將何以釐正版圖擾安邦國臣  
之淺狹誠則貪叨朝有典章敢叨疑非望伏乞迴乾坤之

曲澤收雨露之殊私廣訪訐謨詳求棧樸更引食場之彥  
俾臨均土之司則受任得才無愆振鷺之美官方有序不  
失貫魚之次無任慙悚之至謹詣朝堂奉表陳請以聞臣  
所讓人別狀封進臣某誠惶誠恐頓首頓首謹言

爲歐陽通讓夏官尚書表

臣通言伏奉恩制以臣爲夏官尚書非常之恩忽萃庸朽  
顧匪服而增覲奉如絲而自失臣通中謝臣聞思皇多士  
必求於俊乂惟帝念功不寄於庸保臣識量凡淺志業空  
廢乏刀筆之吏能無俎豆之經術徒以積勞爲忝久宦成

資承日月之末光霑雨露之宏貸丈二之組每慙於假竊  
尺一之制更獎於庸微俛仰慙惶屏營反側夫以天臺峻  
密帝猷殷曠端揆隆於八座樞衡總於萬機非夫賢才孰  
能綜理況周官司馬有甲兵之職漢服珥貂兼喉舌之任  
歷觀前載此選尤難安可以樗櫟散才瓶簣小器比德陳  
劍差蹤鄭履豈無慙於謬寵實有懼於妨官今聖歷惟新  
王化資始天工其代帝難所急伏願特寢過恩旁求實用  
塞多幸之路開至公之道則巨鱗縱壑朝有得賢之頌惟  
鵜在梁臣無濫官之責無任慙懼之至謹詣朝闕奉表陳

請以聞

爲楊執柔讓夏官尚書表

臣執柔言伏奉恩制以臣爲夏官尚書光寵載臨震悸交集臣某誠惶誠恐頓首頓首死罪死罪臣學無所成志不及遠徒以憑託霄漢接南陽之近親感會風雲附西京之外戚遂得叨恩藉幸服冕乘軒將燕雀而同化共鸞鳳而並翼自升榮軒闥接武卿士徒參河海之象竟乏涓塵之效竊位妨賢自甘屏黜循涯揣分敢希超獎而聖造不貲天波累洽仍降非常之澤更申踰等之命豈非連芳八座

上比七星固亦分職五曹專司九法昔虞登百揆命喉舌  
之官晉簡庶僚崇元凱之秩自時厥後此選尤難自非宿  
望通才高賢舊德何以別邦國之大典膺腹心之重寄臣  
尸忝無成實彰於既往朽劣不逮難冀於將來雖輸報有  
心而勉勵無術寧敢自安時謗屢玷國猷陛下綜理機衡  
搜擇才俊而至公之道未廣於翹薪則哲之明近謬於庸  
菲恐人物解體衣冠失望伏乞暫迴冲鑒俯絕過恩更宏  
尚德之舉不失能官之授則濟濟庶寮自有悅於多士區  
區庸鄙儻無譏於候人不任慙懼之至謹詣朝堂奉表以

聞謹言

爲歐陽通讓司禮卿第二表

臣通言臣受恩怖懼已薦款誠而還旨綢繆未垂矜亮俯仰跼蹐心魂震蕩臣通誠惶誠恐頓首頓首死罪死罪臣學藝雙缺心迹兩蕪顧常接言友朋而信未盈缶陳力官守而智罕挈瓶徒以沐道康衢滄和休厯四方無事逢聖后之垂衣百度已貞得庸夫之高枕幸承寬大遂安忝竊本將榮利求達不以廉隅自修厚祿尊官雅是所溺陳辭抗疏豈敢爲高誠以理苟未安義則不可何者器有劑限



物有局量當其才則事或能濟踰其分則力所不堪是以  
枯木朽株不苟棟梁之任謏聞曲學不爲廊廟之資臣妨  
賢自久竊位非今然自承乏具寮叨榮散職雖云尸忝未  
甚隳廢至於典司邦禮出納王言徒飭躬而自強終絕臚  
而無力汝作霖雨旣非庸妄所堪臣爲股肱必致陰陽之  
失虧名損實匪顧身疵蠹政傷風將辱朝鑒誠爲貪冒豈  
敢自安伏願迴日月之明收雲霄之澤察臣由衷之請矜  
臣知止之分則周廟之器無懼於盈滿曹人之衣或免於  
譏刺無任慙懼屏營之至謹詣朝堂奉表以聞臣通誠惶

誠恐頓首頓首死罪死罪

爲武重規讓司禮卿表

臣重規言伏奉今月十五日制書加臣中大夫兼司禮卿  
寵命光臨心靈隕越臣重規中謝臣聞量能而官往聖垂  
範無德而祿昔賢有誠陛下施物之平不私毫髮知人之  
鑒獨謬庸虛但禮秩之職厯選所難苟非得賢於何求化  
西京置一十二列首貫金吾東漢有三十九人多遷玉鉉  
妙擇時望將以洽神祇博採列侯所謂重宗廟桓榮之經  
學始展今恩孫通之禮儀方膺此命在臣無取遠謝古人

將何以載元冕之七旒驅素車之十乘臣之慊慊非欲自保其身臣之悽悽深慮上塵於國伏乞聖恩容納皇澤霑濡深惟得人傍授能者則天官無曠庶績其凝謹封所讓人狀如前不任慙懼屏營之至

爲崔神基讓司賓卿表

臣神基言伏奉恩制以臣爲司賓卿芝渙曲臨獎飾踰分蓬心迴蕩冰炭交集臣神基誠惶誠恐頓首頓首死罪死罪臣才實凡庸志無遠大徒以命偶時來滄和飲澤累叨恩遇浸成榮顯遂得出擁朱軒入陪紫蓋被服珪組周旋

階闢自謬司六尚承乏九賓星琯驟移塵露無紀每懷忌  
滿之誠實負曠官之責寧可以更奉殊微重叨非據當象  
河之顯列處惟月之崇班陛下刻象琬金焚山牂道維駒  
在詠異人並出無容使芳蕙爲菑疑康瓠成寶伏乞天哲  
改擇人望則尚德之舉無累於翹薪匪服之譏不塵於列  
棘無任慙悚之至謹詣朝堂奉表以聞

爲宗楚客讓營繕大監第三表

臣某言臣叨承睿澤冒陳愚懇而九重再達三舍不迴鞠  
躬慙惶莫知啟處臣誠惶誠恐頓首頓首死罪死罪臣自

惟寡薄何階榮遇徒以山林舊籍有感聖慈葭莩末戚特  
延宸獎遂得升朝列位服冕乘軒平視公卿奄同七貴坐  
登霄漢非因六翮自兼司喉舌副掌樞衡百姓不親徒承  
在寬之訓萬機都曠終替責成之舉期獲戾於妨官敢邀  
榮於賜秩而甘露時雨不遺於溥汎尊官厚祿更集於庸  
虛仍令入總巨卿出毗藩牧顧匪材於樗櫟空媿梓人方  
假職於檐帷多慚竹使夫以渚宮作鎮旁兼水陸營室致  
功上儀星象自非馬延年之勤苦羊叔子之恩惠何以撫  
茲千里按彼百工陛下義不斷恩遂忘濯龍之誠微臣寵

深增懼敢冒濡鵠之譏況今天地開元聖神改物四方拭目而觀化九流褰裳而願仕而則哲之鑒未獎於翹薪至公之心近謬於凡菲將恐開親昵之多幸失衣冠之雅望小人淺見偶識自量匹夫雖微敢守難奪伏乞俯停過謬更擇良能則出門同人更釋于宗之吝側席思彥不乏登壇之寶無任慙懼之至謹重詣朝堂奉表以聞謹言

爲王遺恕讓殿中少監表

臣遺恕言伏奉恩制以臣爲殿中少監奉命荒越不知啟處臣某中謝臣行忤神祇身積釁咎偷延苦來自甘隕越

陛下忘其阉陋牽以縶維仰號上昊俯躋下土精誠無感  
三舍不迴志節莫修九泉未即遂復肅膺紫紱權就墨纁  
俛首官寺覲顏朝序自攝職天臺慙簡要之目徙秩京輦  
乏仁明之政銓管無滯多謝昔賢枹鼓不鳴實愧前列空  
尸厚祿坐積時謗不謂天光下濟聖慈曲覽重延殊獎更  
超顯位司六尚之嚴凝望九重之清切懷恩揆拙旣懼且  
慚但臣下棄情禮上虧荅效孝不足稱忠無可紀永惟家  
國實負君親將何以安其尸忝暴之視聽伏乞暫迴冲慈  
少察懇誠不虧聖朝之鑒無重愚臣之罪則涵育有方官

序無替無任哀悚之至謹詣朝堂奉表以聞

爲第十舅讓殿中監兼仗內閑廐表

臣某言伏奉恩制以臣爲殿中監兼檢校仗內諸閑廐逾  
涯之恩忽降霄極非據之惕坐驚魂宇臣某誠惶誠恐頓  
首頓首死罪死罪臣本乏才藝素無操植徒因緒業獲齒  
簪裾屬兩曜重光三靈再造登山捧日始會於風雲涉海  
窺天遂攀於星漢位非德進榮以恩昇出捧鸞鑣驂玉輿  
之式道入陪鳳展預金門之通籍扈清切之嚴衛接綢繆  
之宴私邱山之恩徒謝成貸絲髮之効竟知無補加以兼



烏竊幸假鳳連棲兄弟分侍於閭闈甥舅齊跡於樞祕光  
榮被於九族寵遇傾於百寮是以常識滿盈亟慚尸素叔  
寶之遇武子雖願輸忠正禮之對公山惟憂曠職常思高  
明之瞰室無懼平路之傾軛豈謂天道不貲聖慈逾厚仍  
降非常之澤重紆加等之命妨賢受任多慚於鴛鴦之羣  
匪服叨榮實愧於蜉蝣之羽竊惟先王慎擇不進於凡庸  
明主虛求務延於才俊伏乞傍羅杞梓更詢棫樸必取九  
能秀傑方爲御府之臣無使五技輕姿謬處七閑之任自  
然六尚增價七騶無忝納於百揆終無廢事之譏賓於四

門必有得人之頌無任慙懼屏營之至謹詣朝堂奉表陳謝以聞謹言

讓麟臺少監表

臣嶠言伏奉制書以臣爲麟臺少監依舊兼修國史仍知鳳閣舍人制閣事仰戴私恩退揆愚陋手足知舞之魂載惕臣嶠誠惶誠恐頓首頓首死罪死罪臣一經莫守五技不成官牆易窺俎豆無術陽和布德枯朽同榮雷霆發音閉蟄俱起用叨時幸遂歷清階含香握蘭惟塵於兩鳧之署切問近對匪服於雙鸞之沼西垣載筆五字非工東觀

屬詞兩班難嗣空抱支離之疾坐招尸素之譏惟此挈瓶  
有同畫餅豈足以比肩良史參領祕文猶陪二子之行尚  
忝四郎之末網羅帝籍旣佇英才出納王言寧容妄處陛  
下搜賢擇善責實循名程才畢入於準繩適用不差於輪  
桷伏願特迴鑒揆俯察愚蒙深惟帝難妙簡人才則尚德  
之舉寧謬於鴛池妨賢之談不起於麟閣無任忝竊慚悚  
之至謹詣朝堂奉表陳請以聞臣所讓人別狀封進臣嶠  
誠惶誠恐頓首頓首死罪死罪謹言

讓成均祭酒表

臣嶠言伏奉恩制以臣爲成均祭酒對揚鴻休揣摩褊量  
獎飾踰分周惶增惕臣誠惶誠恐頓首頓首死罪死罪臣  
才不應務命實偶時非親非賢奉帷幄之侍無藝無術備  
鹽梅之臣排金門而上玉堂步駕閣而遊鸞沼抱支離之  
沈痼曠密勿之繁機六翮不任但慚於腹背四支已頓空  
請於骸體分辭榮於瑣闥仍藉寵於環林顧非席上之珍  
敢辱淹中之賞況東序蟻學稱爲教化之宮西膠虎門實  
應文章之宿論姬孔之制度談夏商之損益方期遺典墜  
業有可發明豈伊曲學謏聞所堪尸忝伏望俯停庸察改

命者儒則授几肆筵還知入廟之禮褒衣博帶不濡在梁之翼無任忝竊慚惶之至謹詣朝堂奉表陳讓以聞臣所讓人具如別狀臣嶠誠惶誠恐頓首頓首死罪死罪謹言  
自內史再讓成均祭酒表

臣嶠言伏奉今月二十四日制書除臣成均祭酒同鳳閣鸞臺三品餘並如故列星皦日曲垂鑒揆膏雨油雲傍灑渥澤承命如失負恩不勝臣嶠中謝臣本諸生階緣常調幼趨詩禮纔學修身長習文章罕能經國徒以淹年曠日積勤累勞無翼而偶摩霄不材而參構厦往逢人乏濫荷

天聽預聞政事其近主益尋而犬馬私疾頗至虛羸螻蟻  
殘生俯蒙含育矜其不逮備以閑司臣獲從容稍似強健  
復屬皇慈不已聖獎彌勤始接貂蟬更追龍鳳機務填委  
昏情戰兢風勞霧氣曉迫宵煎因此疲羸慮成廢曠所以  
每求清閑輒事陳乞竊望優游散輩沐浴淳源豈晤大造  
弗遺殊榮累及玷代天之列躡教胄之行且祭酒之榮有  
道之選往年已知不可今者何宜重遊伏乞特寢嚴汗改  
命長才非敢欲逃身責深恐有紊國經由衷精誠惟聖矜  
納無任懇迫慙荷之至謹詣朝堂奉表陳讓以聞其所讓

人別狀封進

爲武攸暨讓官封表

臣某言臣頻布款誠庶蒙矜遂而由衷之請空竭於肝膽  
臨下之鑒未察於庸愚集木非兢臨泉罔懼臣某誠惶誠  
恐頓首頓首死罪死罪臣歷窺前志詳考舊聞莫不以有  
道興邦家不才替社稷漢武帝網羅羣士惟佇俊賢周成  
王訓迪庶官不求庸保臣行能近淺識性凡陋難化之質  
非八音所陶不移之愚豈六藝能飾往緣戚屬叨奉恩私  
遂得地列齊封門開魯館承敦敘於九族被徽章於五等

今光華始旦品物維新三代典章理遵於舊式二京恩澤  
宜革於權制方就散秩之輩幸沾朝請之流寧可以冒踐  
槐庭更增茅土況班彝錫瑞執揆提衡法垂象於三台視  
隆班於四瀆實司邦教是曰藩維豈臣餘喘殘生所合尸  
忝非臣荒情菲質所宜叨據陛下懸旌訪逸刻象求才朝  
有白駒之賢野無黃犢之彥方使思皇多士必明於至公  
豈令棫樸能官近廢於親昵臣自審量實所不堪鄙屋之  
災豈惟於身咎折鼎之責方貽於國患伏冀回光斂靄寢  
紱收綸察臣不移之心矜臣非飾之請特停過誤改命才



良則白馬丹書不慚於異姓和羹作礪不逮於凡庸無任  
慚懼屏營之至謹重詣朝堂奉表陳請以聞

爲武攸暨讓兼知司禮寺事表

臣攸暨言伏奉恩制命臣兼知司禮寺事臣本無操履素  
乏藝能憑藉葭莩遂叨冕笏畫龍刻鵠非有天才簪犀紐  
龜但因地勢鑒空虛微眇之質驗庸闇不逮之姿素簡神  
衷豈勞銓敘幸得攀光日月藉寵侯王祿比萬鍾爵窮五  
等備梁園之車服司周室之典經朝夕起居出入陪奉在  
生多幸於臣已足豈可重叨非據更竊隆班上虧國章下

速身謗昔漢疇稷嗣將冠九響虞昇伯夷實掌三禮奉蒸  
嘗祈祀之典有匏土笙鏞之節匪徒移風易俗兼且尊天  
事神豈於凡庸所可參議況此司禮分職見有二卿並在  
官聯事且無缺更參鴛蹇之足徒亂鴛鴻之序伏乞聖慈  
迴鑒天造曲成矜其慊切之心念其尸曠之責怡然俯察  
霈乎垂許則至公之道實宏於聖朝多幸之災不累於凡  
識無任慚懼屏營之至謹詣朝堂奉表以聞